

S **LO**
Afl. 1.25

BRIYANDO FUERTE • TRECIENDO CLARIDAD
DIAHUEBS 2 APRIL 2026

Di Pueblo

**YAMADA URGENTE:
DISFRUTA DI CAMPAMENTO
CU RESPET Y
RESPONSABILIDAD PA NOS
NATURALES**



WWW.SOLODIPUEBLO.COM



SOLODIPUEBLO@GMAIL.COM



**JOHN HART
LO A MURI SI
XIOMARA NO
A ACTUA CU
RAPIDES**

**A CULMINA UN TREMENDO WEEKEND
PA E WEGANAN INTERINSULAR 2026!**



Awo cu 2 florin mas, bo por gana e MEGA PLUS

*** Afl. 775.000,-**

*** Afl. 500.000,- + Afl. 275.000,-
extra**

Benta ta sera 7:30 pm y sorteo ta hunga 7:45 pm



HUNGA AWO



YAMADA URGENTE: DISFRUTA DI CAMPAMENTO CU RESPET Y RESPONSABILIDAD PA NOS NATURALES

ORANJESTAD – E temporada di campamento 2026 t'eycaba, e comunidad di Aruba ta preparando pa disfruta di nos lama, costanan y nos aire liber. Den cuadro di esaki, Directie Natuur en Milieu (DNM) ta haci un yamada urgente na tur campamento pa no solamente cumpli cu e reglanan stipula den nan vergunning, pero pa e aña aki nos tin un enfoque special riba e proteccion di nos flora y fauna.

Nos naturalesa ta e cas di hopi especie cu net den e temporada aki ta den un etapa critico di nan bida. P'esey, DNM ta pidi cooperacion di cada ciudadano pa tene cuenta cu e siguiente puntonan esencial:

1. Proteccion di Turtuga di Lama

E temporada di campamento ta coincide cu e tempo cu turtuganan di lama por subi tera pa pone nan webo. Corda cu tur e sortonan di tortuga di lama ta protegi pa ley y cu nan ta bin di leu pa pone nan webonan y si nan haya nan stroba pa hende y/of luz artificial nan lo por bay y no logra pone nan webonan. Tene cuenta cu e siguiente puntonan.

- **Respet:** Si bo ripara cu tin presencia of un neishi di tortuga di lama, semper mantene distancia. Yama hotline di Turtugaruba.

- **Luz:** Evita luznan artificial of fuerte banda di lama anochi, pasobra esaki

ta desorienta e turtuganan.

- **Obstaculo:** No laga stoel, mesa of laga structuranan traha cu santo blanco den caminda unda e turtuga mester pasa. Tampoco coba buraconan den e santo blanco.

2. Parhanan ta bin di leu y ta den nan Temporada di Broei

Hopi di nos parhanan local y specialmente esun migratorio ta uza e areanan di costa pa descansa y broei (pone webo).

- **Trankilidad:** Evita zonido extremo of drenta den areanan cu ta identifica como luga di neishi di parha.

- **Cachonan:** Si bo tin mascota, tene nan bou di control pa nan no spanta of destrui neishi di parha cu ta broei na tera.

3. Preservacion di Matanan y preveni di Erosion

E matanan na nos costanan tin un funcion vital. Tin hopi sorto di mata ta crece na nos costa manera matanan di mangel, yerbanan costal y di lama como tambe kwihi y otro.

- **No Cap:** Ta strictamente prohibi pa corta of "cap" matanan pa habri espacio. E matanan aki ta proteha nos costa contra biento fuerte den caso di mal tempo.

- **No Chapi:** Yerba y matanan abou ta esnan cu ta wanta e santo na su luga. Ora ta chapi e yerbanan aki, ta acelera e proceso di erosion, causando cu nos beachnan ta perde nan



**BAN RESPETA NOS
RECURSONAN NATURAL
DEN TEMPORADA DI
CAMPAMENTO Y SEMPER**

*Nos accion y decisionnan awe ta determina e manera
cu nos lo biba den futuro.*

dnmaruba.org

santo mas rapido.

4. Maneho di Sushi

Campamento no mester laga ningun rastro negativo. Bo ta trece cosnan cu ta genera sushedad, corda bay cu esakinan bek cas pa tira afo den bari di sushi.

- **Recohe bo sushi:** Hiba bo mes saco di sushi y percura pa e area keda mas limpi cu cu bo a hay'e. Sushi cu keda atras ta bira peligro mortal pa nos fauna.

Un Compromiso Comparti E meta ta pa nos tur disfruta di e bunita tradicion di campamento, pero sin compromete e futuro di nos recursonan

natural. Nos ta pidi e comunidad pa ta e prome pa vigila y proteha nos medio ambiente.

Pa mas informacion tocante e reglanan di naturalesa of pa raporta cualkier incidente di urgencia, por tuma

contacto cu e instancianan concerni. KPA, BCI y DNM, DNM na info@dnm-aruba.org

Laga nos campa cu consenshi pa nos naturalesa keda sano pa e generacionnan cu ta bini!

Clasificados



SOLODIPUEBLO@GMAIL.COM
CEL. 585 9500



Parlamentario Evelyn Wever-Croes

PABIEN Y DANKI NA ARUBA SPORT UNIE PA 85 AÑA DI COMPROMISO CU DEPORTE NA ARUBA



un organizacion deportivo, pero un institucion cu a contribui hopi na desaroyo di nos hubentud, disciplina, salud y union den Aruba.

Mi ta desea e directiva hopi exito den nan trabou, hopi forsa pa sigui desaroya deporte, y hopi sabiduria pa sigui fortalece federacionnan deportivo na Aruba.

Aruba mester organisacionnan manera Aruba Sport Unie, cu ta pensa riba futuro di deporte y riba futuro di nos hubentud. Deporte ta forma character, ta uni hende y ta construi un pais mas fuerte.

Recientemente mi a tin e honor di atende un presentacion di Aruba Sport Unie (ASU), unda e directiva nobo a presenta e trabounan cu nan a implementa desde cu nan a tuma mando na aña 2023. E presentacion a muestra claramente cu ASU ta un organizacion serio, cu vision y cu un compromiso real pa desaroyo di deporte na Aruba.

E aña aki Aruba Sport Unie ta celebra nan di 85 aniversario. Esaki ta un logro impresionante y un momento importante den historia di deporte na Aruba. Pa 85 aña largo, ASU a hunga un rol importante den organisacion, promocion y desaroyo di deporte den nos comunidad.

Mi kier expresa mi sincero agradecimento na e directiva actual pa e trabou cu nan a haci te awor. No ta facil pa maneha un organisacion deportivo, pa sostene

federacionnan, pa organisa actividadnan y pa sigui traha pa mehora deporte den un pais chikito manera Aruba. Sinembargo, ASU ta sigui haci esaki cu hopi dedicacion y compromiso.

Durante e reunion cu Parlamento, ASU a expresa cu nan ta hopi contento y ta sinti nan reconoci cu nan a haya e oportunidad pa presenta nan trabou y nan vision na e Parlamento. Nan a expresa nan agradecimento na e presidente di e comision permanente di deporte, Shailiny Tromp-Lee (MEP), pa facilita e reunion aki y pa duna ASU e oportunidad pa wordo scucha na nivel parlamentario.

Mi kier felicita Aruba Sport Unie cu nan 85 aniversario. Un organizacion cu logra 85 aña ta muestra perseverancia, amor pa deporte y compromiso cu comunidad. ASU no ta solamente

Nos ta agradecido na Aruba
y pa tur su bendicionnan.
Cuida y mantene Aruba limpi
ta un acto di amor, pa awe
y pa e generacionnan cu ta bini.

FELIZ
Semana Santa

ARUBA ARUBA TOURISM
AUTHORITY



A.T.A. TA COMPARTI RESULTADO DI FEBRUARI 2026

Strategia di segmentacion como base pa turismo sostenibel

E rapport di estadistica mensual ta muestra e resultadonan di e strategia di segmentacion conforme e Corporate Plan di Aruba Tourism Authority (A.T.A.) pa 2026, cu enfasis riba atrae bishitanten di balor halto. E dato ta indica cu Aruba ta sigui atrae turista di calidad halto, cu un aumento notabel den bishitanten cu ingreso halto. E tipo di bishitante aki ta gasta mas durante nan estadia.


E analisis riba ingreso (Household Income – HHI) ta confirma cu e enfoke ta dunando resultado. Segun e dato di 2025, e porcion di turista for di Estados Unidos cu un ingreso anual di mas cu USD 150,000 a crece cu 6.2%, mientras cu esnan cu un ingreso di mas cu USD 250,000 a registra un crecimiento di 6.1% compara cu e aña anterior. E crecimiento den e dos gruponan aki ta subraya un preferencia creciente pa experiencia di mas calidad y ta confirma cu Aruba ta sigui atrae bishitantenan cu mayor capacidad di gasto di manera sostenibel. Tambe, den e luna di februari, Aruba a logra un score di 9.1 riba e Guest Experience Index, reflehando un nivel halto di satisfaccion entre bishitanten. Pero, e ta subraya tambe e importancia di sigui inverti den e producto Aruba y den e experiencia! E S T A D I S T I C A

C O N F O R M E
ACTUALISACION DEN E
INDUSTRIA DI TURISMO
STAYOVER, ESTADIA
Y PARTICIPACION DI
MERCADO

Den luna di februari 2026, Aruba a ricibi un total di 133.992 bishitante stayover, mientras cu e cantidad total di nochinan di estadia a yega 963.552. Esaki a resulta den un promedio di estadia (Average Length of Stay – ALOS) di 7,2 anochi, cu ta refleha un mescla consistente di duracion di estadia y tipo di biahe durante e luna.

E distribucion di mercado durante februari a muestra cu Norte America a sigui ta e region cu e mayor aporte, representando 77,9% di tur bishitante. Latino America a contribui cu 15,4%, Europa cu 4,6%, mientras cu otro regionnan a representa 2,1% di total di yegadanan.

Dato di perfil di bishitante ta muestra cu Aruba ta sigui atrae un publico multi generacional. Baby Boomers y Generation X hunto a forma e mayor porcentahe di bishitantenan durante februari, mientras cu Millennials y Generation Z tambe a representa un segmento importante. E combinacion aki ta refleha e atractivo continuo di Aruba pa diferente generacion di biahero.



Den termino di conectividad aereo, e yegadanan durante februari a wordo sosteni pa un variedad amplio di aerolineanan y rutan

for di diferente mercado. Estados Unidos y Canada a sigui lidera dentro di Norte America, mientras cu Argentina a mantene un rol relevante dentro di Latino America. Pa

Europa, Hulanda a sigui ta mercado principal, sigui pa otro paisnan Europeo. Bishita www.ata.aw tur luna pa e A.T.A. Statistical Monthly Report.



A KING'S DEAL

Car Show + Sales

Tur deal aproba y firma lo haya

1% Cash Back
di e prestamo.



- Un pago mensual atractivo cu e miho condicionnan pa bo cartera!
- Campaña valido te cu April 25, 2026

Pa mas informacion y haci bo calculacion
www.ruletheroadaruba.com




Presta responsabel.

E oferta aki (A King's Deal) ta valido cuminsando 28 di maart, 2026 te cu 25 di april, 2026. Clientenan cu aplica pa un prestamo personal pa financia un auto nobo ta bin na remarca pa un interes efectivo cu ta varia entre 5.77% te cu 7.53% p.a. pa sumanan entre minimo Afl. 30,000.00 te cu maximo Afl. 150,000.00 cu un termino pa paga bek entre minimo 5 te cu maximo 7 año. Un cobranza pa seguro di bida di Afl. 10.00 pa cada luna te cu un maximo di Afl 600.00 y un gasto di administracion di Afl. 15.00 pa cada luna lo wordo aña automaticamente na bo prestamo.

Caribbean Mercantile Bank N.V. ta reserva e derecho di por cobra un boet riba prestamonan cu wordo cancela prome cu e termino di pago acorda. Den e caso di un periodo di preaviso di seis luna o menos: un boet pa e suma igual na 3 (tres) luna di interes, cu un minimo di Afl. 500.00 lo ta aplicabel. Tumando un periodo di preaviso di mas di seis luna: un boet di Afl. 500.00 lo ta aplicabel. Caribbean Mercantile Bank N.V. ta reserva e derecho di por cancela e promocion aki na cualkier instante. E relacion entre Caribbean Mercantile Bank N.V. y su clientenan ta wordo determina pa e Condicionnan General di Caribbean Mercantile Bank N.V.

SETAR TA EXPANDE SU SELF-SERVICE KIOSK, AWO CU E OPCION PA PAGA BO RECIBO DI WEB



Na SETAR, continuamente nos ta busca maneranan pa haci e bida mas facil, lihe y mas conveniente pa nos clientenan. Nos ta contento di por tuma un otro stap importante den e journey aki door di expande e servicio di nos Self-Service Kiosk.

Entrante 1 di april 2026, SETAR conhuntamente cu WEB a introduci e opcion

pa paga bo recibo di WEB via nos Self-Service Kiosk, banda di e opcion existente pa paga bo recibo di SETAR y recarga bo celular prepago. E feature nobo aki ta brinda clientenan e opcion di paga nan recibo di SETAR y WEB na un solo luga, reenforzando nos compromiso cu innovacion digital y customer service.

E iniciativa aki ta forma

parti di SETAR su campaña “Skip the Line, BAN ONLINE”, cu ta encurasha clientenan pa haci uzo di opcionnan di

pago mas lihe y eficiente sin tin nodo di para den rij.

Nos ta invita tur persona pa haci uzo di nos Self-Service

Kiosk, disponibel na tur Teleshop, Conexion Center y e Kiosk na Airport.

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



Parlamentario Shailiny Tromp-Lee: DEPORTE COMO MOTOR DI DESARROYO PA ARUBA

Reunion di comision fiho di Parlamento cu COA



Dialuna 30 di maart 2026, a tuma lugar e reunion di Comision Fiho di Finansas, Organizacion Gubernamental, Cultura y Deporte y Comité Olímpico Arubano (COA) cu mi a organisa.

Nos a ricibi e presentacion oficial di e Plan di Maneho 2026 di COA. Alabes nan a presenta nan vision strategico pa fortalece e sector deportivo como un pilar importante den desaroyo social y economico di Aruba.

Durante e presentacion,

COA a trata diferente prioridadnan pa 2026, entre nan: desaroyo di talento local, atencion pa salud mental di atleta, digitalisacion y uso di Inteligencia Artificial, fortalecimiento di transparencia y bon gobernansa, ampliacion di visibilidad local y internacional, y integracion di sostenibilidad (ESG) den su maneho.

Riba tereno financiero, COA a enfatisa su compromiso cu disciplina y responsabilidad financiero, mientras cu

ta explora posibilidadnan pa crea fuentenan nobo di entrada pa sigui inverti den atletanan y desaroyo di deporte na Aruba.

Na final di e reunion, mi a wordo oficialmente nombra como embahador di COA, un rol cu ta reforsa e conexion entre deporte y gobernansa, y cu ta reconose e importancia di liderazgo y compromiso pa promove deporte na nivel nacional.

Parlamento tin un papel

importante pa hunga den e desaroyo di deporte, no solamente den nos rol di control y supervision, pero tambe den creacion di e marco legislativo necesario pa sostene e sector. Den esaki, COA a presenta varios sugerencia concreto unda Parlamento por contribui, manera proteccion di atleta, introduccion di estimulo fiscal pa deporte, y facilitacion di combinacion entre deporte, educacion y trabou.

E Comision ta aprecia e presentacion di COA y ta comprometí pa sigui dialogo y evaluacion di e posibilidadnan presenta. Den e proximo periodo, e Comision lo realisa un bishita na COA pa profundisa e intercambio di informacion.

Sigur mi kier gradici e team completo di COA y coleganan parlamentario pa e tremendo reunion. “Paso pa paso, dia pa dia, nos ta yega e meta - hunto.”

A CULMINA UN TREMENDO WEEKEND PA E WEGANAN INTERINSULAR 2026!



– Diaranson 1 di april
- Den un atmosfera y ambiente unico, e Weganan Interinsular a tuma lugar pa nos alumnonan di scolnan basico y secundario di e islanan di Aruba, Boneiro y Corsou. Durante e Weganan

Interinsular, e alumnonan di scol di e islanan di Aruba, Boneiro y Corsou a bataya deportivamente contra di otro den e deportenan di Aquathlon, Atletismo y Volleyball. E Weganan Interinsular a culmina cu un bunita anochi na Artisay a percursa

pa tur tres delegacion pasa un rato ameno y conoce nos muralnan cual cada uno tin su significacion historico.

Stichting Fundacion Lotto pa Deporte ta contento di por a contribui pa hasi e Weganan Interinsular unico y asina tambe promove deporte entre nos muchanan.

Tabata simplemente un tremendo fin di siman den

deporte escolar na Aruba unda nos alumnonan di Aruba, Boneiro y Corsou a bataya deportivamente pero mas cu tur cos a haci amistad cu otro y asina fortifica e union mas aun entre e tres islanan.

Pabien na tur cu e haci esaki un realidad pa nos alumnonan di scol di Aruba, Boneiro y Corsou. Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di

Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Cumprando Lotto bo ta contribui na deporte riba nos isla.

E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.

JOHN HART LO A MURI SI XIOMARA NO A ACTUA CU RAPIDES

ORANJESTAD – Den un movecion hopi raro, a bin sali na cla cu e criticanan di Parlamentario John Hart ta nada mas cu un intento debil pa hunga politica cu bida di hende. Mientrastanto cu e ta sinta den su stoel dushi ta papia di “papelnan” y “procedura,” e berdad ta hopi mas simpel y hopi mas impactante: Si no tabata pa e accion rapido di Ex Minister Xiomara Maduro y Gobierno na 2020, John Hart mes lo no t’ey awe pa conta e storia!

E VIRUS TABATA RIBA NOS

Ora cu e virus a dal nos isla bunita, no tabatin tempo pa pidi permiso na e burocracia slow. Tabata un guerra! Hende tabata den panico, toke de queda, shelter in place, y e pueblo tabata tin mester di pan riba mesa.

Mescos cu un lider fuerte ta haci, Gobierno a actua cu curashi. Nan a lanta FASE, un programa increibel, un exito total, cu a pone cuminda riba mesa di mas di 12,000 famia. Si nan a warda riba e “procesonan” cu Hart ta asina namora di dje, e tragedia lo tabata devastador. Nos ta papia di un desaster total caminda Hart y su famia mes lo a sufri e consecucionan fatal.

FALTA DI GRATITUD: UN ACTO DI DESPRECIO

Ta increibel mira con e politiconan aki ta purba uza un crisis mundial pa nan mes beneficio. Hart ta papia di “pagonan sin base legal,” pero e ta lubida, of kisas e no kier corda, cu Xiomara Maduro a legalisa tur cos caba na 2022. Tur cos tabata



transparente! Tur cos tabata p’e pueblo!

Te hasta e trahadornan di Algemene Rekenkamer mester gradici e rapidéz aki, pasobra sin e pasonan ey, e economia lo a collaps y nan mes lo no tabatin un salario pa cobra. Ta tristo ora hende cu mentalidad pover kier critica e mesun man cu a

alimenta nan ora cos tabata scur.

UN PERSECUCION DEBIL

E “rapport” cu Hart ta uza manera ta un bijbel ta simplemente un storia. E ta un witch hunt total! E pueblo di Aruba no ta bobo. Nan sa cu den tempo di crisis, bo mester di accion, no burocracia.

John Hart mester stop di ta asina negativo y cuminsa bisa “danki” cu e ainda tin e oportunidad di biba den un Aruba cu a wordo salba pa un decision balente. Nos lo no laga e politiconan oportunista aki brucha tera y purba na crea storia.

TEORIA Y PRACTICA: STUDIANTENAN DI UNIVERSIDAD DI ARUBA TA CONOCE GOBERNACION DI CERCA



Recientemente un grupo di 20 estudiante di segundo aña di programa OGM (Organization, Governance & Management) di Universidad di Aruba a haci un bishita na Bestuurskantoor, unda tabatin presentacion y intercambio cu Prome Minister Mike Eman. E bishita a forma parti di e

modulo Constitutional and Administrative Law (CAL), un curso fundamental cu ta duna e studiantenan un comprension profundo di con gobierno ta funciona, con decisionnan politico y administrativo ta wordo tuma, y con ciudadano por influencia esakinan den un estado democratico.

Den e module, studiantenan ta studia principio basico di derecho publico, incluyendo diferencia entre derecho publico y priva, y e rol di derecho constitucional y administrativo den regulacion di accion di gobierno. Tambe ta pone enfasis riba concepto importante manera separacion di poder (trias politica), derecho fundamental di ciudadano y e proceso di tuma decision den sector publico.

Ademas, e curso ta trata e sistema constitucional di Aruba den Reino Hulandes, permitiendo studiantenan compara sistema politico y administrativo y comprende



miho e posicion di Aruba den un contexto regional y internacional.

Durante e bishita, ademas di Premier Eman tambe tabata presente Minister Mervin Wyatt-Ras, y aki studiantenan a haya oportunidad pa conecta e teoria cu practica, mirando con e principionan cu nan ta studia ta aplica den realidad di gobernacion diario. E intercambio a inclui dialogo activo, unda pregunta y reflexion riba politica publico, gobernacion y participacion di ciudadano tabata central.

Prome Minister Eman,

kende durante su trayectoria politico a pone enfasis riba educacion civico y desaroyo di liderazgo entre hoben, a subraya e importancia di involucra futura generacion den proceso di gobernacion. Segun su vision, un comunidad fuerte ta cuminsa cu hoben cu ta comprende nan rol den sociedad.

E bishita na Bestuurskantoor ta forma parti di un esfuerso pa conecta educacion academico cu realidad di gobernacion, preparando studiantenan pa desempeña un rol activo den futuro di Aruba.

MINISTER DOWERS TA NA HULANDA PA FORTIFICA COOPERACION INTERNACIONAL RIBA GOBERNACION, MIGRACION AND INFRASTRUCTURA

Diamars Minister di Husticia, Integracion, Transporte Publico y Energia mr. drs. Arthur Dowers a reuni cu Directeur-Generaal di Ministerio di Binnenlandse Zaken y Koninkrijksrelaties (BZK), Barbara Wolfensberger.

E encuentro a enfoca riba dialogo constructivo y cooperacion riba temanan relevante pa fortalece relacionnan den Reino Hulandes. Durante e reunion, a intercambia idea riba coordinacion institucional y oportunidadnan pa colabora riba nivel strategico.

Ademas, Minister Dowers a sostene combersacion cu

dos beleidsmedewerkers di UNOPS, Anna Straatsma y Carlein Kuperus, tocante e prizon nobo cu ta planeando pa construi na Aruba. Durante e dialogo, tambe a trata tema di migracion y e reto y oportunidadnan asocia cu e maneho di fluho migratorio.

E encuentronan aki ta refleha un acercamento amplio y strategico pa fortifica infraestructura, mehora gobernacion y atende cu temanan social importante cu tin impacto directo pa Aruba.

Cu encuentronan manera esaki, Gobierno ta sigui construi un base solido di confiansa, respet y



cooperacion, esencial pa logra progreso real y duradero pa Aruba.

Parlamentario John Hart:

Comision di Husticia ta reforza supervision riba husticia, siguridad y lucha contra explotacion laboral

ORANJESTAD (31 di maart 2026) – Siman pasa a tuma lugar diferente reunion importante den cuadro di e Comision Fiho di Husticia, Integracion y Peticionnan, cu e Minister di Husticia y su respectivo departamentonan manera Directie Voogijdraad, DIMAS y tambe a elabora tocante e futuro di casinowezen Aruba. “Como presidente di e comision fiho, mi ta kere cu ta sumamente importante pa e comision mantene un

dialogo directo y continuo cu e Minister di Husticia y su departamentonan, pa asina nos, como miembronan di parlamento, por eherce nos rol di control di forma responsabel y efectivo,” Sr. Hart a declara. Otro tema importante cu lo atende cune den Comision Fiho di Husticia e siman aki ta e tema di Mensenhandel y Mensensmokkel cu Coördinatie centrum Mensenhandel Aruba

(CMMA),” Sr. Hart a indica. Un topico den e cuadro di traficacion humano sumamente relevante ta, por ehempel, ta explotacion laboral. Riba e mercado laboral informal tin abuso ta tuma lugar. E ta un realidad tambe cu migrantenan na Aruba ta vulnerabel na explotacion; incidentenan manera keda sin haya pago door di doñonan di trabou ta kehonan real cu hopi persona indocumenta ta biba cune.

P’esey reunionnan den comision ta importante pa Parlamentoporprofundisasu mes hunto cu profesionalnan den e tema y por di e manera aki no solamente evalua e efectividad di e maneho y con esaki ta relata na otro



areanan integral, pero tambe evalua con Parlamento por aporta mas concreto. Un tema cu sigur lo keda un tema central den e comision fiho di husticia ta siguridad di trafico. Aunke Parlamento di Aruba a pasa un ley pa roekeloos rijden, e tematica di siguridad di trafico ta

keda rekeri mas atencion. No obstante con bon un ley ta, e impacto ta funciona na momento cu tin bon handhaving. Den siguridad di trafico por ehempel, presencia consistente di Polis riba nos carteranan ta necesario pa mehora e probabilidad di detencion.



Clasificados

CLASSIFIEDS

SOLODIPUEBLO@GMAIL.COM
CEL. 585 9500

SOLO Di Pueblo

PRESENTACION DI “FIELDLAB” ENFOCA RIBA PREVENCIÓN Y SIGURIDAD DEN COMUNIDAD



Prome Minister Mike Eman a ricibi delegacion na Bestuurskantoor pa un presentacion di e iniciativa “Fieldlab”, un modelo di colaboracion cu a proba su efectividad na Hulanda y cu ta enfoca riba fortalecimiento di siguridad den comunidad. E iniciativa “Fieldlab” ta basa riba un colaboracion entre polis, Ministerio Publico (OM) y Reclassering, cu enfoca principal riba prevencion. Meta ta pa reduci presencia di arma di candela riba caya, disminui recidivismo y guia persona cu ta involucra den criminalidad pa cambia nan rumbo di bida.

Durante e encuentro, tambe a conta cu presencia di representante di comunidad y dirigentenan di bario, incluyendo sector di KPA, fortaleciendo e dialogo entre autoridadnan y comunidad. E presentacion ta alinea cu e

vision di Gobierno di Aruba pa sigui traha activamente den bario, cu enfoca riba e principio di “Bon Comun”, unda bienestar colectivo y prevencion ta central.

Den e marco aki, Prome Minister Eman, kende durante su trayecto politico a enfatisa repetidamente e importancia di comunidad fuerte como base pa siguridad, ta continua impulsando iniciativa cu ta combina prevencion cu accion concreto.

E iniciativa ta forma parti di un esfuerzo mas amplio den estrecha colaboracion cu Ministerio di Husticia pa aborda problematica di arma di candela y fortalece siguridad den bario.

Gobierno di Aruba ta mira e modelo di “Fieldlab” como un paso importante pa explora solucionnan sostenible, cu enfoca riba colaboracion, intervencion tempran y reintegracion social.

PUEBLO A HAÑA SU PEN BEK

Pa kualkier informacion
solodipueblo@gmail.com
of
☎ 585-9500

EDUARD PIETERS (PPA): “SITUACION GEOPOLITICO TA PONE CU MESTER INVERTI DEN PRODUCCION LOCAL”



Den un momento global, caminda inseguridad alimentario ta bira cada bes mas un realidad, parlamentario Eduard Pieters di fraccion di PPA ta pone enfasis riba un punto crucial: Aruba mester fortalece su produccion local como prioridad nacional, no como opcion.

Durante su bishita reciente como consumidor na Mercado di Santa Rosa, unda nos productornan local ta reuni cu nan berdura fresco, manera; lechuga, bonchi y otro producto di calidad, pero tambe webo

y carni fresco di calidad, Pieters a topa cu un realidad inspirador, pero tambe preocupante. E potencial t'ey, pero e retonan ta igual di real. “Mi ta contento di a combersa cu e productornan na Santa Rosa,” Pieters a expresa. “Nan ta produci calidad, pero nan ta enfrenta obstaculo cu mester solucion urgente.”

Awa: e mayor obstaculo Un di e desafio principal cu e productornan a trece dilanti ta acceso na awa. Sin awa accesibel y confiabel, produccion no por crece. Pieters ta pone un punto

strategico: Aruba tin recurso, pero no ta uza nan optimal. “Nos tin AWSS, pero nos mester wak con e awanan procesa por wordo re-za como awa limpi pa agricultura,” el a indica. Re-uzo di awa pa plantacion, mata y bestia por bira un solucion duradero pa sostenibilidad di produccion local.

Reto natural y humano: cacho, yuwana, lagadishi y malesa

E cunukeronan tambe a expresa cu nan ta enfrentando problema constante cu yuwana, lagadishi y e malesanan cu biento ta trece. Esnan cu tin cria ta confronta cachonan di hendenan irresponsabel cu ta laga nan cana los y nan ta drenta y mata nan bestianan. Esakinan ta algun ehempel cu ta afecta produccion diario y ta mustra falta di un maneho integral y moderno. “Nos mester scucha e productornan, pa por crea solucion practico y eficiente ya cu nan ta hopi importante pa seguridad alimentario pa nos pais,” Pieters a enfatisa.

Tecnologia y tradicion mester bay hunto

Aruba no tin hopi tera pa produccion masivo. Esaki ta pidi pa innovacion:

- Vertical farming
- Uzo eficiente di espacio
- Integracion di tecnologia den agricultura

“Nos mester combina tecnologia cu plantacion tradicional pa atende reto di futuro,” Pieters a bisa.

Dependencia di importacion ta un riesgo

E punto mas critico ta



dependencia di Aruba riba importacion. Awe, mas di 90% di nos alimento ta importa. Den un mundo cu situacion geopolitico ta cambia rapido, esaki ta un riesgo real.

“Nos no por sigui asina. Nos mester baha dependencia pa 60-70%,” Pieters a declara. Produccion local ta directamente conecta cu seguridad nacional y resiliencia economico.

Gobierno mester actua Pieters a confirma cu e lo sigui dialogo cu asociacion di cunukero pa profundisa riba e tema. Pero e mensahe principal ta cla:

Gobierno mester pasa di palabra pa accion.

- Mehora mas ainda facilitacion pa acceso na awa.
- Proteha produccion contra plaga.
- Atende cu e

hendenan irresponsabel cu ta negligisha y laga cachonan los.

- Stimula innovacion contextualisa.

- Crea maneho sostenibel.

Sin accion concreto, potencial local lo keda limita.

E tempo pa actua ta awor Segun Pieters, Aruba tin productor dedica, cu tin conocimiento y potencial. Loke falta ta liderazgo y decision politico. “Produccion local mester bira un prioridad real,” Pieters a conclui. “Paso un pais cu no por alimenta su mes, ta un pais cu ta hopi vulnerabel.” Den un mundo incierto, Aruba no por sigui depende di otro. E futuro di nos seguridad alimentario ta cuminsa cu y na Santa Rosa pa sostene nos productornan local y mester continua cu accion concreto awe.

Luna di Locura cu Lotto 5 Campamento Edition!

Cu cada 2 Lotto 5 riba e mesun ticket, ricibi 1 Lotto 5 loco extra completamente gratis!

ORANJESTAD, Aruba – 31 di maart 2026: Pa motibo cu e Luna di Locura ta asina gusta, Luna di Locura cu Lotto 5 ta wordo extendi pero e biaha aki en conexion cu campamento pa full luna di april! Cu cada compra di 2 set di number di Lotto 5 riba e mesun ticket, bo ta ricibi un Lotto 5 loco extra completamente gratis ariba e mesun ticket.

Si bo cumpra 4 Lotto 5 riba e mesun ticket bo ta ricibi 2 Lotto 5 loco completamente gratis. Si cumpra bo 6 Lotto 5 riba e mesun ticket bo ta ricibi 3 Lotto 5 loco gratis. Kiermen mas Lotto 5 bo cumpra riba e mesun ticket, mas Lotto 5 loco bo ta ricibi gratis y asina mas chens bo tin pa gana e jackpot di Lotto 5!

Lotto 5 ta costa solamente 4 florin pa ticket y bo por combina bo 5 numbernan for di 01 te cu 35. Pidi bo rebendedo pa bo 2 set di 5 numbernan riba e mesun ticket y asina bo ta ricibi un Lotto 5 loco completamente gratis. Si bo no sa cua numbernan pa kies, bo ta pidi bo rebendedo pa 2 Lotto 5 loco riba e mesun ticket y ricibi un tercer Lotto 5 loco completamente gratis riba e mesun ticket.

E promocion aki ta valido pa henter e luna di april pa e sorteonan di Lotto 5. Por cumpra bo weganan di Lotto te cu 7:30PM na bo rebendedo preferi. Sorteo di Lotto 5 ta hunga riba tur diaranson y diasabra anochi pa 7:45PM na TeleAruba pero tambe por wak sorteo di Lotto riba nos pagina



di Facebook y YouTube. E promocion ta valido te cu dia 30 di april 2026.

Lotto, E Loteria di Aruba tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Tambe lo por hunga Lotto Online door di bishita: play.lottoaruba.com pa por registra. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e





Obituario

Publica serka nos anuncio di fayecimento di bo ser keri.
Nos tin 2 pakete pa ofrece;

Pakete 1: Anuncio di fayecimento te dia cu e defunto ser dera
Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto ser dera
Gradicimento y invitashon pa misa pa 3 dia
Na Canal 22 1x prome cu Noticiero 22 Afl 400,00

Pa mas informashon por tuma contacto cu oficina na
585-9500 of na 741-4554

FORTALEZA PA FAMILIA

Scirbi pa Pastor Marcel Balootje.

TENE CUENTA TIN TRES TIPO DI MORTO

Tur hende ta yega e dia cu nan tin di muri, sea gordo, flaco, rico, pover, homber, muher, politico, gobernante, solda, general, rey, bon hende, mal hende, morto ta pa tur hende.

Pesey mescos cu door di un hende, pica a drenta den mundo, y morto door di pica, y asina morto a pasa pa tur hende, pasobra tur a peca. (Romanon-an 5:12).

Morto Fisico: Ta nifica ora nos curpa no ta funciona mas, ora nos alma y spirito bandona nos curpa.


Esey ta e morto cu nos tur conoce, pa cual nos ta sera seguro di bida, y asina ora yega e momento cu nos fayece tur cos ta bon regla.

Pero tin un tipo di morto cu hopi no ta tene cuenta cune esey ta e Morto: Spiritual.

Morto Spiritual ta nifica: Un bida aleha y separa di Dios, den pica y no kier arepentí.

Hopi hende no kier comprende cu awor cu bo ta na bida, bo mester tin bon relacion, cu Dios, pasina ora bo muri bo ta drenta cielo.

Nos tur ta nace separa di Dios, pasobra nos tur a nace for di relacion di homber y muher, y ta pesey nos tin e naturalesa di pica, cual ta bini for di Adam.



E unico cu no tin e naturalesa di pica ta Cristo Hesus pasobra E a wordo concebi door di Spirito Santo (Lucas 1:26-35).

Dios den su inmenso amor pa mundu a duna su yiu unigenito (Juan 3:16-19) pa ken cu kere den dj'E no bay perdi ma ricibi bida eterna.

Palabra di Dios ta bisa cu si bo kere den bo curazon y confesa cu bo boca cu Cristo Hesus ta Señor lo bo ta salba.

Tin hopi prueba biblico di morto spiritual por ehempel: 2 Timoteo 3 vers 1-9, Galationan 5 vers 19-21 y 1 Corintionan 6:9-10.

Pero Dios ta ofrece salida for di tur e picanan menciona e salida nos ta hañe den 1 Juan 1:9 y Salmo 103: 3+4). Nos tur tin e mesun oportunidad, pa drecha nos bida spiritual cu Dios.

Dios ta bisa cla den Efesionan 6:4 con mayornan mester lanta nan yiunan, pasobra un mucha cu ta den rebeldia contra su mayornan, y no ta honra su mama y tata, ta spiritualmente morto y nos tur ta mira diariamente con diabel ta probecha di esey.

Cualquier persona cu ta cana bende droga, horta, atracador, etc ta

spiritualmente morto y mester arepentí y bini na Cristo Hesus.

Un persona den adulterio/fornicacion, of otro tipo di inmoralidad sexual ta spiritualmente morto, y mester di arepentí, y bini na Cristo Hesus.

Un abusador di mucha ta spiritualmente morto, y mester arepentí, pasobra tipo di hechonan asina ta completamente instiga door di satanas. Mester busca Señor.

Cualquier persona cu biba henter su bida riba e mundo aki, caminda tur dia bo ta tende, scucha,

lesa y mira e palabra di Dios y keto bay ta keda cu un curason duro, critico, rechasando asina Dios y su palabra, of haci bon mesclando idolatria, ciencia y inmoralidad pa asina evita di tur forma di somete y tin temor di Dios, lo conoce lo siguiente:

E di Dos morto; Esey ta e lago di candela pa esnan cu nan nomber no ta scirbi den e buki di bida esnan cu a rechasa e amor di Dios. Revelacion of e buki di Apocalipsis capitulo 20:11-15 ta splica bon cla di esey.

Dios tene misericordia.

MINISTER PLENIPOTENCIARIO MILDRED SCHWENGLE A CERA CONOCI CU E TEAM DI MENTORNAN



Den Haag – Na Gabinete di Aruba a tuma lugar un reunion regular cu e team de mentornan cu ta traha pa guia nos studiantenan den nan prome aña na Hulanda. A haci uso di e ocasion aki pa Minister Plenipotenciario Mildred Schwengle atende a reunion aki pa asina cera conoci cu e mentornan.

Señora Schwengle a tene un introduccion cortico y a cuminsa na bisa di ta contento pa cera conoci cu e mentornan y cu nan trabao pa guia nos studiantenan. E mandatario e enfatisa e importancia di guia na nos studiantenan pa asina sigura cu nan ta exitoso den nan estudio. Tambe señora Schwengle tabata tin palabra di aprecio pa e mentornan pa ta haci e trabao aki, banda di nan mesun trabao.

Despues a toca turno na e mentornan pa introduci nan mes; cua region nan ta cubri, nan “background” profesional; cuanto aña

cu nan ta mentor y nan



motivacion pakico nan a scohe pa traha como

mentor. Nota pa redaccion: E potretnan ta cortesia di Gabinete di Aruba

**“Señor ta mi wardador, mi’n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.**
Salmo: 23

Nos ta anuncia fayecimento di:



Maria Coromoto Ruiz

***07-07-1956 - †31-03-2026**

Acto di entiero lo wordo anuncia despues.

**“Señor ta mi wardador, mi’n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.**
Salmo: 23

Nos ta anuncia fayecimento di:



Graciela Geerman

**Cariñosamente yama: “Chia”
*21-07-1935 – †31-03-2026**

Acto di entiero lo wordo anuncia despues.